

COLUMNA

Daventar quiet

DAVID SPINLER

Nus pudain cumenar la sesida senza problems – tuts èn vaccinads. U betg?» – Egliadas interrogativas sin mai. I restan. Las egliadas guardan sco sche la dumonda fiss stada: «Ha insatgi fatg insatge illegal avant questa sesida?» La sesida cumenza. Tuts fan sco sche nagut na fiss schabegià.

Elias Canetti scriva en ses cudesch «Masse und Macht» che in sentiment decisiv da la vita en ina massa è il sentiment dad esser persequità e da sa sentir persequità. La massa, tenor Canetti, definescha inimis – e quels pon lura far suenter tge ch'els vulan, i vegn adina interpretà sco nauscha intenziun. Il cudesch da Elias Canetti (el ha survegni 1981 il Premi Nobel da literatura) datescha da l'onn 1960. El è ussa puspè actual. Impressionant è che Canetti n'ha tenor mia chapientscha da l'ovra betg pretendì da savair precis co che tut funcziuna cun massas e pussanza, la lectura u il lectur duai vegnir sez a sias constataziuns ed enconuschientschas.

Ina dumonda è co che las personas che èn en il focus da la massa sco perse-



quitads pudessan agir: Els pon «midar vart» ed uschia era tutgar tar la massa, quai po avair in effect deliberant. Perder sia individualità per betg pli stuair sa confruntar cun il mund. Ins pudess era dir: resignar.

Jau sai – l'ovra da Canetti era ed è discutada. È il cudesch in summa scientific? Suenter ils onns 80 han ins lura taxà l'ovra sco sapientivamain critica envers las tradiziuns scientificas. Ma laschain star l'ovra dad Elias Canetti.

Tge che jau n'hai anc betg chapì en noss mund actual è il motiv, il mument u il mecanissem che maina al fatg che posiziuns diversas na pon betg pli vegnir discutadas, nua ch'ina situaziun cupitga, cura che fronts daventan di-

ras. La tema gioga segirain ina rolla. E tuttina na chapesch jau betg pertge ch'ina societad democratica che viva fermamain tenor il princip da la discussiun cuntraversa dad opiniuns na funcziuna tuttenina betg pli tenor quest princip. In princip che tenor mai è fitg ferm e gida gist en situaziuns malsegiras da chattar ina soluziun ferma. Ed ussa – en temps fitg malsegirs – bittain nus gist quel princip per il tempel en. Tge forza che la tema ha!

Ed ussa? Discutar na funcziuna damai betg pli. Tut sa polarisescha pli e pli ferm. La discussiun dad arguments cuntravers, che avess en sasez gist da schliar la polarisaziun, è ussa l'instrument che dat aria al feu. Taschair? Quai n'è betg ina opziun. Resignaziun na schlia betg problems.

Daventar quiet è forsa ina via. Daventar quiet e betg perder la persvasiun. La persvasiun da metter en dumonda chausas. Betg per provocar. Ma per chattar la via. Per far daventar pli ferma la soluziun per la quala ins decida la fin finala.

David Spinnler da Sta. Maria è mainagestiun dal Parc da natüra Biosfera Val Müstair.